

饶编睿遗集

饒編審遺集

克崇署



序

烏乎·吾讀默全遺文竟·乃廢書而歎曰·何天之生才不數·而必于不數之中·不使之滋培長養以至于大成·而必干戈以擾之·道路以苦之·寒餓以困之·疾痛以賊之·而卒至勞其心思·焦其毛髮·以卽于死·雖有師友提攜葆愛·爲之號籟護持·終無以挽其垂絕之生·斯豈造物不仁之嫉其生邪·抑天上奇才亦少·必召之返邪·吾嘗以爲人之靈明術智·其美醜大小盈臍之數·蓋有定焉·譬玉之寓璞然·璞厚則發之也難·薄則斷之也易·斷之也易·光精之發越也早·則世所謂夙慧也·神童也·發之也難·其英華之洩露也晚·則世所謂困學也·晚成也·然而困學常勝于夙慧·神童之不能躋大成·則又何也·蓋所謂夙慧神童也者·以其難能也·父母寵之·鄉里譽之·自視亦大異于常人·于是狂傲誕妄·束書不觀·以爲人莫己若·及年事增·神智殺·才華日謝·欲求爲常童而不可得·安覩所謂神邪·此介甫所爲傷仲永也·其幸而有自知之明·奮力于學·而勤勞逾恒等·以焚膏爲未足·必竭其力以赴之·雖才華足焜耀·然精氣銷鑠·終天其天年·此昌谷母所爲傷其子也·二者交悼·然而長而無聞·乃不若短命而卓卓有所成就爲足多也·或曰

設天假之年·其成就不當益大乎·吾意不然·吾嘗以玉璫璞喻人之靈明術智矣·其造詣之高下·亦必與其年並·文章之事·與人之精氣相輔爲用者也·必年事富·精力沛·而後其文章光氣乃足籠罩百世而莫之遏·故人之爲學也·幼弱爲始基·中歲爲造極·及其老也·苟澤之以學·其不至退敗幸耳·安望其能逾中歲邪·此吾讀默全文竟·初傷其年之不永·爲之歎詫·而終不爲默全痛者·以其所造詣·精光焜耀·必足與昌谷逢原較短長而無媿色·足以傳百世而無所疑也·烏乎偉矣·太歲在重光赤奮若玄月福州曾克崙

傳

曾克崙

饒世忠·字默全·湖南長沙人也·世業農·而君資稟瓌特·自其爲童子時·已異于常兒·未冠·肄業湖南大學·病上庠所授雜亂無統紀·乃請於校長輟學一載·于其鄉居發篋讀蕭氏文選范氏後漢書·既卒業·乃益肆力于文章·奮志淬勵·忘食飲節·體日羸·而所爲賦頌淵懿樸茂·自六代入·駸駸乎躡漢魏矣·會倭夷入寇·中樞播遷·建行都于蜀巴縣·而長沙適以鎮者數驚敵·大縱火·全市以燼·君乃間關歷百艱·至行都·章士釗行嚴者·以通貫中西學術爲世重·夙負獎拔任·而君之鄉邑前輩也·君至行都·窮無所歸·其校長皮君·適旅巴·爲言於士釗·士釗讀其文·大驚歎·以爲鄉里後進所未有也·乃爲揄揚于朋輩·于是吳興沈尹默尹默·吳縣汪東旭初·桂縣陳毓華仲恂·永安黃曾樾蔭亭·貴池王世勳調父·懷寧潘伯鷹鳧公·閩侯曾克崙履川·咸以爲其才異恆等·非今世所有·爭折節與交·引與游讌談論·于是聲譽漸隆起矣·而君顧不以此自多·會寶山張嘉森君勸·欲揚闡吾文教也·於雲南之大理創民族文化學院·君乃跋涉險阻·歷煙瘴崎嶇波濤數千里往學·不數月·學院以費絀輟業·君乃復返巴·吾嘗讀其上院長張

君書·累千言·論歷代學術之要歸·始於持躬涉世·終於成業達材·以救敝箴俗改過自克爲亟·於天人之故·古今之變·中外之同異·莫不洞貫·慨然有以道自任之意·非僅欲以文章顯者也·當是時太谷孔祥熙方掌邦計·懷于人心世道之日陷溺·又聖裔也·欲以家學矯之·乃創孔學會於行都·以余宗聖裔也·命董其事·余以君有志於道也·乃假以一席·願以費絀亦無所表著也·士釗旋復爲言于教育部長吳興陳立夫·立夫復大異之·辟爲編譯館編審·命下而君已寢疾·卒于歌樂山醫院矣·春秋二十有五·未娶·無子·以阻兵亂·無由以耗達其家·就行都某所窆葬焉·其喪其葬·士釗實經紀之·方君之疾也·余與伯鷹數往視·既知其不可爲也·乃悉收其遺稿而藏之·間以示吾友同邑黃孝紓芻庵·孝紓讀其曾文正公墓頌·歎曰·淵懿樸茂·魏晉之遺響也·其詞曰·丁丑之秋·余遊平塘·清故毅勇侯曾公歸骨於此·撫事懷賢·徘徊平原·意有悽然·遂奏章通情·並爲之頌·以歌詠盛烈·湖南大學學生饒世忠·謹上書清故毅勇侯曾公閣下·伏維君侯膺當期之正統·體天地之純精·邈列聖之遐蹤·包生民之睿智·在昔上帝鑒顧斯世·宣尼旣沒·生民流蕩·取則無處·乃乘時應命·生德於君侯·俾其修德弘躬·通神太上·流

聲光赫·師表於天下·是以異符星象·表之自昔·神隆在淵·底命元吉·有清儉位·漸
虐黎獻·稔沴薦臻·民人弗康·九域颯回·南土波詭·敬皇位於綴旒·危神器於基疊·
乃命君侯·龍驤漣濱·虎步衡嶽·黃旗繽紛·紫塵燦燦·英風章於解服·孝思深於投
紼·推心納貞吉之謀·廣宇進出奇之客·於是林居穴寓之士·垂竿卜肆之哲·莫不投巾
釋耒·忘幽解素·企斗極而知歸·望長淵而鱗萃·負氣程力·思效微命·爾乃楊彭蛟
騰·布羅虎噬·李郭獻籌於右·羣賢補闕於後·思謀無遺·道義畢湊·驍騎長驅·威聲
載路·乃凌江夏·江夏無波·乃扶匡廬·匡廬不震·元猾灰分·遺疥雲散·還皇輿於夷
庚·光天步於清穆·率土離沸糜之亂·有衆蒙再造之慈·自古輔臣股肱·翼戴王家·立
功立事·未有若君侯之箸盛者也·世忠頓首頓首·忠聞聖人所以作人倫之表式·英功所
以定生民之流極·得其表·則非常之功可觀·依其人·則日章之道彌新·是以程極瞻影·
長驚天衢·遺業延壽·逸而有終·而忠身生百年之外·命違風雲之會·不得廁立胥附·
與在奔走·徬徨塵路·不知所裁·遠惟聖靈·實含罔極·忠聞歌詠所以彰盛德之隆·銘
頌所以宣成功之烈·是以書載伊呂·詩述山甫·雍容餘韻·久而愈新·伏維君侯·英謀

超於在昔·道德冠乎前世·斯故生民之所詠歎·詩頌之所揄揚者也·忠文敵質陋·思穆如之清風·徘徊德音·不勝踴躍之情·謹作頌一篇·雖不足敷宣盛烈·亦後生之至思也·世忠頓首頓首·厥初生民·有聖有則·上帝降監·文思在昔·宣尼既邈·典型斯息·乃作君侯·俾民是式·是式伊何·隆身自微·則天箸跡·考典成機·矩地必順·重元不違·通幽洞冥·珠光玉輝·有清不競·靡定羣獻·赫赫洪楊·乘運虎變·發迹南荒·紛綸字縣·金陵席捲·地坼淮甸·巖巖君侯·乃奮厥武·釋服投篇·黃旗乃舉·服敵成兵·巖居心膂·耀威湘潭·振響天宇·湖南既出·克殄江夏·龍躍順流·樓船屢駕·懷寧既服·潯陽冰化·四方風從·克承英霸·洸洸英霸·威靡不陵·荆陽之旅·其會如林·燹伐元寇·至於金陵·推師羣帥·據節高吟·元寇既殄·宇宙蒙乂·哀我人斯·既溺而濟·三光復陽·折柱重契·禹維陞洪·茲亦等肄·帝祚豐戎·命爵命位·銘誓於金·繡華於黻·仗鉞京畿·逡巡三事·玉璣載光·典文垂藝·皇皇君侯·既受帝祉·遐思崇替·垂典述禮·遺德延祚·施於孫子·布濩天區·流輝萬禩·君所爲文僅存者凡二十篇詩八十八篇都凡一百有八篇·曰饒編審遺集·君卒後二十年·其友閩侯曾克崑乃得躬理董·爲

刊布於香海。

論曰·昔太史公傳司馬相如·悉其詞賦之工者錄之·文士雖無位業勛勤可稱·而主文譎諫·文章光氣足焜耀百世者·或亦非功烈富貴所能並也·世忠去相如且二千歲·其文采雖未極·其感憤何減相如·況年僅逾冠邪·昔茂陵以書爲人取去爲恨·而世忠之書·赫然在几案·余獨得備論而簡刊之·其遇不愈於相如邪·而終未能躋乎相如者·則年爲之也·豈非天哉·豈非天哉·

評語

閩縣黃芻庵先生曰·饒編審文·以廣文心數篇·事出于沈思·義歸于藻翰·疏酌羣言·取高前式·當爲全集之冠·上某公書·氣體高騫·文正墓頌·樸茂淵懿·得魏晉遺意·哀誄之文·華實相宣·不爲空綺·趨向甚正·朱驩先壽頌·脫胎顏延年曲水詩序·古意盎然·胡漣公祠堂記·模範漢碑·具兩京遺意·詩古體摹擬選體·故是湘派家法·今體才氣縱橫·惟自得之處尙少·所謂可以博衆好而不可喻獨坐也·天假以年·其成就正未可量也

挽詩

曾克崙

哀音方徹天·枯淚欲奪目·斯文看將喪·何只爲君哭·四天纏劫燒·號呻橫萬族·文物盪飛灰·百年豈能復·顧瞻神州禍·見禮幾尊宿·鴉音日以張·蟲書誰能讀·淵淵蔚宗書·昭明之所錄·涵濡發爲文·氣接西京樸·曾侯墓門頌·光可霄漢燭·舂蠶信能通·怛化痛何速·吾姓同湘鄉·微學況私淑·銘章誓奮筆·雖君未我屬·天地此菁英·文字此骨肉·九京若可追·眞當百身贖·

弱齡髮半凋·精氣久消鑠·孱軀委末運·私意每作惡·演孔會何時·況我故不學·一枝記借君·聊以安囊橐·禮羅聞有司·斯事欣有託·辟書苦淹滯·鬼伯橫來搏·孤榻歌樂山·幽夢逾落莫·照面寒日光·形枯氣漸索·起死知無方·猶冀得大藥·強詞作慰藉·中若被銚鏑·亦思屢存問·道遠苦行脚·反畏消息來·寸心疑縣鐸·淒皇遊子意·孤淚中夜落·烏乎魂安之·麓山勢嶢嶢·

平生師友詩·斷編好掇拾·豈惟見交期·庶幾存百十·時危珍散聚·篇翰慮盪析·萬古文人心·孤嘔定誰識·吁嗟猛悔樓·絕塵世誰及·剗劖看未終·行復校君集·君才實雄

驚·山立峙岌岌·謙冲出語笑·惘摯見拜揖·豈惟其文邪·純樸有其質·眞當慎長養·
衰國起廢疾·眼中此天道·培傾久失職·妄庸自老壽·高明鬼瞰室·嗟君縱不死·抱一
誰法式·送死吾誠工·吐憤九垓塞·

饒編審遺集卷上

長沙饒世忠

廣文心雕龍

神會篇

氣之動物·物之感人·精合其形·辭舉其意·神會之謂也·故山水無情·終古不變·神思聿傳·風情乃章·其照心也·若仙源之啓闕·其感目也·若雄風之動人·情思雖騰·詞令寫其聲貌·胸臆雖鬱·文字泄其深心·使覽者按文而率情·因事而得景·此文事之機軸也·情感同歸·所緣或異·天桃狀之子之丰容·杖杜比鄭君之無輔·此感物而有興也·悲哉見秋士之心·疾首顯忠臣之痛·此述臆而自寫也·事物雖殊·其趣有要·塗術苟昧·辭必失當·故竭情體物·必窮銖鏤之能·選辭就班·必挾風雲之勢·總斯二途·並資神駿·夫山川觸目·萬途並呈·觀形則色滿於前·諦聽則聲盈於耳·默焉定志·精淪世表·渺焉動神·思含無間·寸心之滂沛·若橐籥之靡盡矣·然樞機司契·先須總緝·考中失而決去留·定從違而部先後·芒析穎分·實利神慮·然後微思綴節·若線之貫珠·

比類成章·若鴻之有序·神之運也·信其微矣·若夫遺言表意·因字見心·一句之中·鏗鏘珠玉之聲·一辭之間·掩映煙雲之色·使辭之附物·若體像之出模型·文之寫情·若藥石之除暝眩·蓋文筆之能事也·鋪觀詩騷·歷賞千載·後來才彥·罕或爭雄·尋其思入無倫·精浮神內·比興不窮·伴若無端·乃其神駿也·華藻連翻·新辭婉轉·體物無遺·妍姿不竭·乃其智博也·故夫文有定規·而能在文外·秉意學文·宜審心質·文含至道·故必稟天地而爲心·包萬物而爲學·方其研慮·控引宇宙之間·及其放言·搜奇林囿之表·譬之建章之宮·昭陽之殿·必竭大匠之精思·盡衡陽之文梓矣·是以偏才罕通·含毫綴文·必有所患·鈍思之士·景物滿前·木焉無感·是情不會物也·學貧之徒·奇思涌襟·妍藻先匱·是辭不會情也·陸士衡云·每自屬文·恒患言不稱意·意不稱物·范蔚宗云·常耻作文士·文患其事盡於形·情急乎藻·義牽其旨·韻移其意·故知斯事之難·古今同患·然則凝神以窮心感之功·勸學以濟才短之患·此亦有補於才思矣·贊曰

山輝川媚·思蓄情蔚·藻翰森飛·篇章不匱·選辭慎微·失幾無會·文事多途·並資神

銳·

巧辭篇

禮云·情欲信·辭欲巧·經言所昭·其意深矣·昔乳媪懷放逐之誅·方朔進言·而漢主回意·樂令流敷奏之談·潘岳錯綜·便成名筆·乃巧言之驗也·詳觀內外二傳·史漢所載·名臣之談·辯士之議·言窮焯焯·聲振金玉·雄邁之風·炤灼千載·雖其理富·抑亦其心巧也·是以巧以綜言·數窮兩術·結體運奇·思出慮表·神思窮詭譎之態·謀篇盡不測之情·使一章之勢·若碧鷄之耀儀·一篇之姿·若神龍之莫極·聽之者疎魄·聞之者決心·是曰意巧·屬辭比事·婉轉附物·寫心則在我者無餘·曉情則在人者必喻·辭若醇醪之有味·句若頽坻之含風·是曰辭巧·文章之功·總歸意巧·事關造化·理絕名言·故不繁說·巧辭之術·董其大歸·可爲八目·一曰襲舊以爲新·任昉奏云·理絕通問·而妄肆醜辭·通夕不寐·而謬加大杖·此襲舊以爲新也·二曰雄辭以增氣·庾子山碑云·西都列國·長沙王功被山河·東京貴臣·大司馬名高霄漢·此假雄辭以增氣也·三曰促節以揚聲·上林賦云·轄白鹿·麟狡兔·軼赤電·遺光耀·追怪物·出宇宙·此促

節以揚聲也。四曰蓄勢以竦心。鄒陽書云。是使布衣韋帶之士。不得爲枯木朽株之資也。此危言以作勢也。五曰反辭以爲健。庾子山賦云。荒谷縊於莫敖。冶父囚於羣帥。按內傳云。莫敖縊於荒谷。羣帥囚於冶父。今賦倒之。所以爲健也。六曰回復以厚情。按鄒陽之書。子建之表。旨歸一途。而辭多繁複。此反覆以篤情也。七曰雋辭以增姿。王千秋賦序云。雖非淮橘不遷之情。又懷漢柳今移之恨。語不改舊。而文有新致。此雋辭以增姿也。八曰稚直以爲美。李白詩云。少小不識月。呼作白玉盤。呼月爲盤。其謬已甚。而覽者轉嘆其妍。此由其天真之著也。然巧言致功。貴在情信。華靡靡當。則從麗非經。雖相如矜葛天之唱。揚雄騁美新之奏。並自競於淫浮。無關於麗則矣。或謂文章由學。能在天資。規矩可傳。巧不能授。而神工雖妙。必記形器。妍歌遏雲。不出宮商之韻。妙舞降神。寧離趨步之節。誠能研詩以廣言。繹騷以薄智。摹往以定規。選辭以極變。則入室之功。覆手可致。懸日之譽。何遠之有哉。贊曰。

人物含靈。精微相感。辭理入神。陰舒陽慘。致曲乃工。功深玄覽。聖誠立誠。佞辭毋濫。

隸事篇

隸事者·言篇章之內·絢辭以爲彩·隸者附也·役也·謂假言以盡義·使事以建功也·意有指適·言所不盡·援彼說此·以少總多·猶御者不勞·假輿馬而致遠矣·尋詩人屬篇·皆直抒情性·婉轉盡意·不取事情·至屈原離騷·始用有娥之說·九歌天問·歷敘古初之言·雖有敷陳之形·亦非藻績之義·兩漢才人·辭壯意盛·總采之義·略依騷人·而以言述意·莫用舊辭·由是言之·隸事之言·不得云始於漢世也·世說稱陸機云·鬼子敢爾·又羊孚云·明公啓晨光於積晦·澄百流以一流·然則以鬼表人之祖宗·又隱射鹿之事·以積晦百流說喪亂·而以啓澄顯勘亂之功者·其殆隸事之禰乎·是知隸事之事·成於口語·後入文筆·由魏晉之士·祖尙風流·清談之中·以雋語自喜·談者對面·嵯峨葳蕤·難以爲巧·故必微顯以示奇·約言以切事也·其後傅亮任沈·獨擅筆奏·隸事織辭·彌近彌密·傳教修廟·以微管比子房·任彈劉整·以不寐爲兄子·沈奏王源·以何魴作齊女·則可謂陋甚斷章·極使事之能事矣·先是則顏延年王融謝莊之文·亦好采事類·其曲水詩序·暨上封禪儀注表·便是語無虛句·句無虛字·後來祖述·唯